

漢書門			
九	四	二	
九	三	二	
冊	架	函	號

內閣文庫			
六	九		漢
函	四		書
一	五	二	
架	冊	號	類

內閣文庫			
番號	漢	9412	
冊數	5 (4)		
函號	298	261	

0 1 2 3 4 5 6 7 8 9 cm

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



淺草文庫

晦菴先生語錄類要卷第十一

勉齋黃先生門人括蒼葉士龍編次

今事類

蔡京在政府問人才於族子蔡子應○端明之孫以

張直柔對時注擬令子應招之授以門館張

至以師禮自尊一日教其子弟學走子弟云從

來先生教某門慢行今習走何也張云乃翁作

相父敗壞天下相次盜起先殺汝家人惟善走

者可脫何得不習家人以為心風白京京愀然

曰此人非病風召與語問所以扶救今日之道

及人才可用者張遂言龜山諸人姓名自是京

父子始知有楊先生姓名

問橫渠觀驢鳴如何文公曰不知他底死着許多

氣力鳴做甚麼良父却云也只是天理流行不能自己

鄒志完曰道鄉先生嘗赴貶所到某州劉元承爲太守舟人覆云若載鄒正言不敢取一文錢劉遂撻之元承當蔡京用事時煞做好官橫浦語錄載張子韶戒殺不食鱗高抑宗相對故食之龜山云子韶不殺抑崇故殺不可抑崇退龜山問子韶周公何如人對曰仁人曰周公驅猛獸放龍蛇滅國者五十何嘗不殺亦去不仁以行其仁耳文公曰此特見其非不殺且猶有未盡須知上古聖人制爲網罟佃漁食禽獸之肉但君子遠庖厨不暴殄天物須如此說方切事情

秦檜初罷相出在某處與客握手夜話庭中客偶及富公事秦忽掉手入內客莫知其故久之方出再三謝客云荷見教客亦莫知所謂扣問乃荅云處相位元來是不當起去是渠悔出偶投其機故發露如此趙丞相初亦不喜之及其再入全然若無能趙便喜其收斂不做一聲遂一王向不疑之亦不知其如此胡康侯全不見得後來事亦是知人不明又云秦檜之是有骨力措其用之錯或問他何故不就攻戰上做文公曰他是見得這一邊難成功兼秦得之高宗意向亦決不爲戰討○客謂富公孫直柔周敬王四十一年至戊孔子卒至于宋慶元三年丁巳一千六百七十六年文公是年正旦書於

藏書閣下東楹
張以通問向在黃巖見顏魯公的泐孫因事到官
持魯公告勅五七通末皆魯公親書以黃紙爲
之此義如何曰魯公以能書名當因自取書之
只用印文亦不足疑本朝蔡君謨封贈其祖告
勅亦自書之蓋其以字名人亦樂令其自寫也
王介甫嘗作一篇兵論在書院中硯下是時已參
政劉貢父見之值客直入書院見其文遂言庶
官見執政不應直入書院且出少頃廳上相見
王問劉近作劉遂將適間之文意換了言語答
他王大不樂退而碎其文王蓋謂我說之不奇
故如此然江西人好拗
張子韶人物甚偉在高宗時除講筵嘗有所奏陳

上云朕只是一箇至誠張奏云陛下對羣臣時
如此退居禁中時不知如何上云亦只是箇誠
又問對官嬪時如何上方經營答語間張奏云
只此便是不誠時高宗容諫故臣下得以盡言
張侍郎一生學佛此是用老禪機鋒
晉元帝祖逖越河所向震動王導便戴若思監其
軍遂無成矣紹興初岳飛軍已向汴都秦檜從
中制之又建炎初宗澤留守東京招徠羣盜數
百萬使一舉而取河北數郡當時事即可整頓
乃爲汪黃二相所制快快而死京師之人莫不
號勤於是羣盜四出爲山東淮南劇賊
文公病甚卧息書樓下吟詠古栢行三數遍葉味
道侍立文公云偶看中與小記載勾龍如淵入

爭和議時言詰若果有此言如何夾持前進以
取中原最可恨者初來魏公既已勉車駕到建
康當紹興七年時金主已篡高麗裔粘罕相繼
或誅或死劉豫見疑於金二子又大敗而歸北
方更無南向意如何魏公纔因呂在見黜趙丞
相忽然一旦發回蹕臨安之議一坐定着竟不
能動不知其意是如何因太息久之云為大臣
誤國一至於此自今觀之大為可恨若在建康
則與中原氣勢相接北面顧瞻則宗廟父兄生
靈塗炭莫不在目雖欲自己不能自己者惟
是轉臨安南北聲迹寢遠上下宴安都不覺得
外面事事變之來皆不及知此最利害方建康
未回蹕時胡文定公方被召沿江而下將至聞

車駕已還臨安遂稱疾轉去看來若不在建康
也是徒然出來做得甚事是時有陳無玷者字
筠叟在荆鄂間為守聞得車駕還臨安即令人
齎錢酒之屬往接胡文定吏人云胡給事赴召
去多日兼江面闊船多如何去尋得守云江面
雖闊都是下船你但望見有逆水上來底船便
是胡給事船已而果然當時講和本意上不為
宗社下不為生靈中不為息兵待時只是怯懼
為苟歲月計從頭到尾大事小事無一件措置
得是當然到今日所以長父安寧者全是宗社
之靈看當時措置可驚可笑
文公因言陳同父上書乞遷都建康而曰黃帝披
山通道未嘗寧居古之人何嘗要安居今宮室

臺榭妃嬪媵嫡之盛如此如何動得初高宗本
遷都建康了却是趙忠簡打疊歸來蓋初間金
人入寇羣臣勸請高宗避之忠簡力勸得高宗
躬往撫師行至平江而止繼而淮上諸將相繼
獻捷趙公得人望正在此時已而欲返臨安適
張魏公來遂堅勸高宗徑往建康及淮師失律
趙公荒窘急勸請高宗移歸臨安自此遂不復
動矣看趙忠簡後來也無奈何其勢只與金人
講和是時已遣王倫以二十事使金約不稱臣
以濁河爲界此便是講和了後來秦檜力排趙
公遂以不肯講和之罪歸之使萬世之下趙公
得令其名者乃檜力也
施全刺秦檜或謂岳侯舊卒非是蓋舉世無忠義

這些正義忽然自他身上發出來秦檜引問之
曰你莫是心風否曰我不是心風舉天下都要
去殺金人你獨不肯殺金人我便要殺你
文公傷時世之不可爲因歎曰忠臣殺身不足以
存國讒人構禍無罪就死後人徒爲之悲痛奈
何劉莘老死亦不明今其行狀似云死後木匣
取其首或云服藥皆無可考國史此事是先君
修正云劉摯梁燾相繼死嶺表天下至今衰之
靖康之禍使元城了翁諸人在亦了不得伯謨亦
心腹潰了
某嘗謂士大夫不能盡忠言於壽皇真爲自負蓋
壽皇儘受人言未嘗有怒色但不樂時止與人
分疏辨析耳

坡公作温公神道碑叙事甚略其作富公碑甚詳
温公是他已爲行狀若富公則異是富公在朝
不甚喜坡公其子弟求爲此文恐未必得而坡
銳然許之自今觀之盖坡公欲得此爲一題目
以發明已意耳其首論富公使北事豈苟然哉
盖坡公因熙寧元豐間用得兵來狼狽故假此
說以發明其議論爾又曰富公使北之策自知
其下但當時無人承當故不得已而爲之耳非
其志也使其道得行如所謂選擇監司等事一
一舉行則內治既強遠人自服有不待於此矣
今乃增幣通和非正甚矣
魯叔問温公薨時程子以郊禮成賀而不吊如何
曰這也可疑或問賀則不吊而國家事體又重

則不吊似無可疑曰便是不恁地所以蘇東坡
謂子於是日哭則不歌即不聞歌則不哭且如
早作樂而暮聞親屬總麻之感不成道既歌則
不哭這箇自是一脚長一脚短以其觀之是伊
川有些過處所謂三揖而進一辭而退不成道
辭亦當三又如罪疑惟輕功疑惟重天下事自
是恁地稱停不得
問靖康之禍若得如前輩之賢者一兩人莫可主
張否文公曰也難主張胡文定謂龜山使當時
早用其言也須救得一半這說得極公道
歲旱持壽皇禁中祈雨有應一日引宰執入侍劉
恭甫奏云此固陸下至誠感通然天人之際其
近如此若他事一有不至則其應亦當如此願

臣之體
陛下深加聖慮則天下幸甚恭甫斯語頗得大

沈公雅言趙丞相鎮靜德量之懿而諳練事機則
恐不逮秦公張子功以爲不然且曰壽在都司
日忠簡爲相有建議者公必計曰如是則利在
上而害在民如是則害在上而利在民今須如
此行則利澤均而公私便至秦公則僚屬凡有
關白默無一言退而屬諸吏事出皆吏輩所爲
而非復前之所擬矣
孝宗晚年來極爲和易某因奏對言檢早事天語
云檢放之幣惟在於後時而失實只這四字盡
得其要領又言經總制錢則曰聞之巧爲名色
以取之於民其於天下事極爲諳悉

因論西夏事曰當時事不可曉看來韓范亦無素
定基本只是逐旋做去且如當時覆軍殺將這
下方且失利他之勢甚張忽然自來納款求和
這全不可曉後來不父元昊遂死不知他不死
數年又有甚姦謀大未可知且如當時朝廷必
欲他稱臣遂使契丹魏令之契丹方自以爲功
朝廷亦未有所處又却二國自相侵陵不爾則
當時又須費力大抵西人勇健喜鬪三五年必
一次爲邊害本朝韓范張魏公諸人皆只是一
箇秀才於這般事也不大段會只是被他忠義
正當故做得恁地
孝宗甚英武劉共甫奏事便殿嘗見一偶馬在殿
庭間問王公明公明曰上萬機之暇即跨之以

習騎射故也。公曰：「萬少年習著數論其間有一說云是本朝何一之萬少年習著數論其間有一說云是本朝自李文靖公王文正公當國以來廟議主於安靜九有建明皆以生事日之馴致後來天下幣事極多此說甚好且如在仁宗朝是甚次第時節國勢却如此緩弱事多不理得英宗即位也自有性氣要改作但以聖躬多病不久晏駕所以當時謚之曰英及神宗繼之性氣越緊尤欲更新然天下事難得恰好又撞着介甫來承當所以如此作壞文公又曰介甫變法固有以召亂後來文都不別去整理一向放倒將去亦無緣治安。」

神宗理會得文字極喜陳殿院帥錫之文嘗於太

學中取其程文閱之每得則貯以錦囊及殿試編排卷子奏御時神宗疑非師錫之文從頭閱至中間見一卷子曰此必陳帥錫之文也寘之第三已而果然。

問初本朝建國何以不都關中曰前代所以都關中者以重河左右旋繞所謂臨不測之淵是也近東獨有函谷關一路通山東故可據以爲險又關中之山自西而東若橫山之險乃山之極高處橫山皆黃石山不生草木及本朝則自橫山以北盡爲西夏所有河山之固與吾共之反據高以臨我是以不可都也至神宗銳意欲取橫山蓋得橫山則可據高以臨彼然取橫山之要又在求洛故求洛之城夏人以死爭之我師

大敗時神宗聞喪師大勸聖躬由是不豫又
曰方神宗初即位富鄭公為相問為治之要鄭
曰須是二十年不說着用兵二字此一句便與
神宗意不合已而擢用介甫首以用兵等說稱
上旨君臣相得驩甚時建昌軍司戶姓某上平
戎策介甫力薦之初為秦鳳路經略司幾宜後
為通遠軍一戰而復熙河捷書聞上大喜解白
王帶以賜介甫賞其知人又加為龍圖閣待制
以為熙河帥紐於一勝之後廟論一意主於用
兵三敗至於求洛極矣求洛之敗徐禧死之禧
師川之父魯直之妹夫也
范文正為開封府為百官圖以獻因指其遷進遲
速次序曰某為契遷某為左遷如是而為公如

是而為私意頗存丞相呂夷簡夷簡不樂由是
落職出之知饒州未幾呂亦罷相後呂公再入
元昊方犯邊乃以范為經略西事公亦樂為之
用嘗奏記呂公云相公有汾陽之心之德仲淹
無臨淮之才之力後歐陽公為范公神道碑有
驩然相忘得戮力平賊之語公之子堯夫不以
為然乃刊去之歐公聞之甚不樂也范公平曰
宵襟豁達毅然以天下國家為己任既為呂公
而出豈後更有匿怨之意况公嘗自謂平生無
怨惡於一人此言尤可驗忠宣固是賢者然其
規模廣狹與乃公不能無間
熙寧三舍法李定所定崇觀三舍法蔡京所定胡
德輝瑗嘗作學記謂學者所以學為忠孝也今

欲訓天下士以忠孝而學校之制乃出於不忠
不孝之人不亦難乎
問龜山出處曰蔡京晚歲漸覺事勢狼狽亦有隱
憂其從子應之自興化來因訪問有甚人亦應
之愕然曰天下人才盡在太師陶鑄其何人敢
當此問京曰不然覺得日前盡是面諛脫取官
職去做底人恐山林間有人才欲得知應之曰
太師之問及此則其不敢不對福州有張與柔
直者抱負不苟時適到部京遂賓致之為塾客
即入書院與柔直傾倒因訪策焉柔直曰今日
救時已是遲了只有收拾人才是第一義龜山
自此方有召命柔直後守南劍設方略以拒范
汝為全活一城甚得百姓心其去行在所也買

花梳雜碎之物不可勝數使者莫測其意後過
南劍老稚迎拜者相屬於道柔直一拊勞之
且以所置物分惠至今廟食郡中柔直與李丞
相伯紀厚善其卒也丞相以詩哭之云中原未
恢復云何喪斯人
羅秘丞日錄云柔直嘗知鼎州秘丞罷舒州士曹
避地於鄉之石牛寨與之素昧平生時方道使
柔直入湖南乃寄詩存問云昔聞避世門余馬
何事標名篆石牛千里重湖方鼎沸可能同上
岳陽樓則其汲汲人物之意亦可見矣
建炎間勤王之師所過恣行擄掠公私苦之有陳
無玷者作其縣宿戒邑人各備器械候聞鐘聲
則人執以出後其所居相比拊列未幾勤王之

師入縣將肆縱橫之狀即命擊鍾邑人聞之如其戒以出師徒見其戈矛森列不虞有備相顧失色整師而過秋毫無犯邑人德之
渡江初一番講和金人以河南之地歸我未幾敗盟大舉入寇秦檜知大恐問朝士計策張巨山稟微誦曰德無常師主善為師善無常主協于克一檜異之獨留巨山問適間之語巨山曰天下之事各隨時節不可執泥曩者相公與金和者時當講和也今金人輒敗盟則曲在彼我不得不應亦時當如此耳因為畫策召諸將為攻戰之計秦大喜即命巨山為奏藁倉卒不予細起頭有句云伊尹告成湯曰德無常師主善為師孔子曰陳力就列不能者止遂急書進呈會

之又喜遂播天下決策用兵已而劉信救穎昌大捷金人遂退檜復專其功又大喜亟擢用巨山至中書舍人有無名子作詩嘲之一聯云成湯為太甲宣聖作周任又建寧范汝為猖獗士人如歐陽穎士施達吳琮皆從之又有陸堂謝尚有鄉曲之譽賊言使二人來招我等降矣朝廷遣之賊拘繫久之遂為賊用賊破歐吳皆誅死陸謝施達以檻車送行在至中途達謂二人曰吾輩至必死曷若自裁達乃令人為藥三丸大小形色一同一乃無毒者達先取服之餘二人服即死達至行在歸罪二人理官無所考證從未減但編置湖南中途又逃去或為行者或為典庫藏後望淮去址走降金改名宜生登偽

科擢用甚峻逆亮犯淮時猶爲之奉使此來時
邵武黃尚書通老爲館伴黃幼與施同筆研雅
相好至是不欲見其人以疾辭遂改命張子公
宜生猶問子公通老安在子公以實對欲扣虜
中事不可得時因登六和塔子公領客宜生先
登亟問之曰奉使得無首立之念乎宜生日必
來言方終而介使繼至宜生色爲之變既歸即
爲金所誅

逆亮臨江朝臣震怖各津遣其家屬他走亮退家
在都城者惟左丞相陳公康伯起居郎黃公中
二人而已時高宗懲維揚之禍故百官搬家者
皆不同

戴少望云洪景廬楊廷秀爭配享俱出可以無黨

曰不然要無黨須是分別得君子小人分明某
嘗謂九事都分做兩邊是底做一邊非底做一
邊是底是天理非底是人欲是即守而勿失非
即去而勿留此治一身之法也治家則分別一
家之是非治一邑則分別一邑之邪正推而一
州一路以至天下莫不皆然此直上直下之道
若其不分黑白不辯是非而猥曰無黨是大亂
之道也

今之學規非胡安定先生所定者自仁宗皇帝置
州縣學取湖學規矩頒行之湖學之規必有義
理不如是之陋也如第一條謗訕朝廷之類其
出於蔡京行舍法之時有所改易乎當時如節
孝先生爲楚州教官乃罷之而易其黨大抵由

者有罪這般法意是少好某嘗說作縣訟牒頗多自有箇處置每聽詞狀集屬官都來列位於廳上看有多少均分與之各自判去到着到時亦復如此若是眼前易事亦各自斷去若有可疑等事便留在集衆輕重斷去無有不當則獄訟如何會壅滯此非獨長官省事而屬官亦各欲自效兼是初官如簿尉使之決獄聽訟亦是教誨之意也

其在漳州豐憲送下狀如雨初亦隨事斷幾件後又覺多了恐被他壓倒了於是措置幾隻厨子在廳上分了頭項送下訟來即與上簿合索案底自入一厨入案已是自入一厨一日集諸同官各分幾件去定奪只於廳兩邊設幕次令逐項

叙來歷末後擬判候食時只就郡厨辨數味食同坐食訖即逐人以所定事較量初間定得幾箇來自去做文章不說着事情其不免先為畫一樣子云某官今承受提刑司判下狀係某事一甲家於某年某月某日有甚干照計幾項乙家於某年某月某日有甚干照計幾項逐項次第寫令分明一甲家如何因甚麼事爭起到官乙家又如何來解釋互論甲家又如何供對已前事分明了一某年某月某日如何判一某年某月某日某家於某官訪某官又如何斷以後幾經番訪並畫一寫出後面却點對以前所斷當否或有未盡情節擬判在後如此了却把來看中間有擬得是底並依其所擬斷決合追人

便追人若不消追人便只依其所擬申提刑司
去有擬得未是底或大事可疑却合衆商量如
此則事都了亦無壅滯
胥吏沉滯公事邊求於人不可無術以防之要在
嚴立程限他限日到自然苦苦要索不得做守
令有可以白干沉滯底事便是無頭腦須逐事
上簿逐事要了始得某爲守一日詞訟一日着
到合是第九日詞訟某却罷了此日詞訟明日
是休日今日便刷起一旬之內有未了事一齊
都要了大抵做事須是令自家常閑吏胥常在
方得若自家被他文字來叢了討頭不見吏胥
便來作幣做官須是立紀綱紀綱既立都自無
事某每到官即以此法曉諭定要如此如諸縣

發簿曆到州亦使磨底磨得子細審底審得子
細初間吏輩以爲無甚緊要在潭州押下縣簿
付磨筭司及審計司限到三兩日却不見到根
究出乃是交點司未將上印持決兩吏後來每
每如限雖欲邀索也不敢遷延縣道知得限嚴
也不敢邀索如此等整頓幾件自是省事此是
大綱紀

某爲守如遇支給官負俸給預先示以時日到此
日只要一日支盡更不留未支這亦防邀索之
幣看百幣之多只得嚴限以促之使他大段邀
索不得
勉齋問曰有繼母不恤其前妻之子父爲某任其
子貧窶不能自活哀鳴于有司有司以名分不

便只得安慰而遣之竟無如之何曰這般所在
當以官法治之也須是追後母責戒勵若更離
間前妻之子不存活他定須痛治因云程先生
謂舜不告而娶舜雖不告堯當告之矣堯之告
之也以王法添之而已又云昔為浙東倉時紹
興有繼母與夫之表弟通遂為接脚夫擅用其
家業恣意破蕩其子不甘來訴初以其名分不
便却之徑趕至數十里外其情甚切遂與受理
委楊敬仲敬仲深以為子訴母不便某告之曰
曾為其父思量否其父身死其妻輒棄皆與人
私通而敗其家業其罪至此若不與之根治則
其父得不御冤於地下乎今官司只得且把他
兒子頓在一邊渠當時亦以為然後竟拖延畢

竟他終不以為然某後去官想休了初追之急
其接脚夫即赴井其有罪蓋不可掩
其人為太守當見客日分先見過客方見同官及
寄居官人問其故曰同官有稟議待商量區處
頗費時節過客多是略見即行若停輒在後恐
妨行色此事可法

禮書已定中間無所不包某欲作一科舉法今之
詩賦實為無用經義則未離乎說經但變其虛
浮之格如近古義直述大意遂立科取人以易
詩書為一類三禮為一類春秋三傳為一類且
如子年以易詩書取人則此前二年舉天下皆
習此三經卯年以三禮取人則前此二年舉天
下皆理會此三禮午年以春秋三傳取人則前

此二年又舉天下皆理會此春秋三傳如易詩書稍易理會故先用此一類取人如是周而復始其每舉所出策論皆有定所如某書出論某書出策如天文地理樂律之類皆指定令學習而用以爲題葉味道云此法若行但恐卒未有考官文公曰須先令考官習之

今朝廷盡力養兵而兵常有不足之患自兵農既分之後計其所費知是無日不用兵也

文公因說慢令致期謂之賊云昔在同安作簿時每點追稅必先期曉示只以一幅紙截作三片某作小榜徧貼云本廳取幾日點追某鄉分稅仰人戶鄉司主人頭知悉只如此到限日近時納者紛然此只是一箇信而已如或違限遭點定

自斷不怨所以人怕公曰今日令報部之事除此今人說輕刑者只見所犯之人爲可憐憫而不知被傷之人尤可念也且如劫盜殺人者人多爲之求生殊不知死者之爲無辜如此則是知爲盜賊計而不爲良民地也若如酒稅偽會子及飢荒爲盜之屬猶可以情原其大小輕重而處之

今人獄事只管理會要從厚不知不問善惡是非只務從厚豈不長姦惠惡大九事付之無心因其所犯考其實情輕重厚薄付之當然可也若從薄者固不是只云我要從厚則此病所係亦不輕某在長沙治一姓張人初不知其惡如此只用所犯追來久之乃出頭適有大赦遂且與

編管後來聞得此人為惡不可言又只平白地
打殺不問門前有一木橋問販者自橋上過以
拄杖拄其橋必捉來吊縛此等類甚多若不痛
治何以懲戒公等他日仕宦不問官大小每日
詞狀須置一簿帶字號錄判語到事亦作一簿
發放文字亦作一簿每日必肉了號要與拍
許多事都了方得若或做不辨又作一簿記未
了事日日檢點了方不被人瞞了事今又只胡
亂隨人來理會來與不來都不知豈不誤事
文公因言耿守作浙漕時有一榜在客位甚好說
用攷課之法逐州縣官不許用援有績可攷自
發薦章如攷課在上挾貴者即降從次等不
有人言賑濟利害文公因曰今賑濟之事利七而

害三則當冒三分之害而全七分之利必欲求
全恐併與所謂利者失之矣
為政如無大利害不必議更張議更張則所更之
事未成必闕然成紛擾卒未已也至於大家且
假借之故子產引鄭書曰安定國家必大焉先
問程正思言當今守令取民之弊渠能言其弊畢
竟無策就使臺官果用其言陳於上前雖戒敕
州縣不過虛文而已文公曰今天下事只礙箇
失人情便都做不得蓋事理只有一箇是非今
朝廷之上不敢辨別這是非如宰相固不欲逆
上意上亦不欲忤宰相意今聚天下之不敢言
是非者在朝廷又擇其不敢言之甚者為臺諫
習以成風如何做得事

今日之法君子欲為其事以拘於法而不得騁小人却徇其私較越於法而不之顧姚崇擇卜道使患未得人范淳夫唐鑑賤之唐鑑議論大段好欠商量處多范文正富文忠當仁宗時條天下事亦只說擇監司為治只此是要方今朝廷只消置一相三叅政兼六曹如吏兼禮戶兼工兵兼刑樞密可罷如此則事易達又如宰相擇長官長官擇具寮今銓曹注擬小官繁劇而又不能擇賢須每道只令監司差除亦好每道仍只用一箇監司學者因舉陸宣公之言以為豈有為臺閣長官則不能擇一二屬吏為宰相則可擇千百具寮文公曰此說極是當時

如沈既濟亦有此說之意

或問井田封建如何曰亦有可行者如有功之臣封之一鄉如漢之鄉亭侯田稅亦須要均則經界不可不行大綱在先正溝洫又如孝弟忠信人倫日用間事播為樂章使人歌之倣周禮讀法徧示鄉村聚落亦可以代今粉壁所書條禁馬子嚴見文公言近有人作假書請托公事者曰收假書而不見下書之人非善處事者舊見吳提刑達公路當官凡下書者須令當廳投下却將書於背處觀之觀畢方發付其人令等回書前輩處事詳密如此又某當官時有人將書來者亦有法以待之須是留其契湯當面折書若無他方令其去

李椿年行經界先從他家田上量起今之輔弼能有此心否
問今之神祠無義理者極多若當官處於極無義理之神祠雖係敕額九禱祠祈雨之類不往可
否文公曰某當官所至須理會一番如儀案所具合禱祠神祇有無義理者使人可也
或問為政者當以寬為本而以嚴濟之曰某謂當以嚴為本而以寬濟之曲禮謂蒞官行法非禮威嚴不行須是令行禁止若曰令不行禁不止而以是為寬則非也
有一朋友作宰通監司等書先說無限道理陳公亮作帥謂之曰若要理會職事不須如此迂闊某以為名言

今人說寬政多是事事不管某謂壞了這箇寬字文公因說劉子澄好言家世曰某在南康時有一子弟騎馬踏損人家小兒某評而禁之子澄以為不然某因講西銘九天之下疲癯殘疾惇獨鰥寡吾兄弟顛連而無告者也君子之為政且要主張這一等人遂痛責之大抵人不可有偏倚處

法家者流往者常患其過於慘刻今之士大夫耻為法官更相循習以寬大為事於法之當死者反求以生之殊不知明于五刑以弼五教雖舜亦不免教之不從刑以督之懲一人而天下知所勸戒所謂辟以正辟雖曰殺之而仁愛之實已行乎中今假法以求生則人無所懲懼陷於

法者愈衆雖曰仁之適以害之然亦難言其
某南康臨罷有躍馬于市踏小兒將死某時在學
中令送軍院次日以屬知錄晚過廨舍知錄云
早上所刑已拷治如法某既而不能無疑於其
說回至軍院則其冠履儼然初未嘗經拷掠也
遂將吏人及犯者評次日吏人杖脊勒罷偶一
相識云此是人家子弟何苦辱之某曰人命所
係豈可寬弛若云子弟得躍馬踏人則後日將
有甚於此者矣况州郡乃朝廷行法之地保佑
善良折挫豪橫乃其職也縱而不問其可得耶
後某罷諸公相餞於白鹿某為極說西銘民吾
同胞物吾與也一段今人為秀才者便主張秀
才為武官者便主張武官為子弟者便主張子

弟其所陷溺一至于此時文公因出謁回取吏

杖之譙樓下云中西川之賦對文公登仰本

吳茂實云政治當明其號令不必嚴刑以為威也

曰號令既明刑罰亦不可弛首惟不任刑罰則

所謂號令者徒掛牆壁耳與其不遵法以梗吾

治孰若懲其一以戒百與其覆實檢察於其終

曷若嚴其始而使之無犯做大事豈可以小不

忍為心○言經界及此

為守令第一是民事為重其次則便是軍政今人

都不理會

因論監司巡歷受折送曰近法自上任許一次受

學者曰看來亦只可量受文公曰某在浙東都

不曾受

黃勉齋言辛幼安帥湖南賑濟榜文只用八字曰劫禾者斬閉糴者配文公曰這便見他有才此八字若做兩榜便亂道又曰要之只是籠法銓擇之法只好京官付之監司選人付之郡守各令他隨才擬職州申監司監司申吏部吏部長吏審察聞奏下授其職却令宰相擇監司吏部擇郡守如此則朝廷亦可無事又何患其不得人
陳亮同父謂今要得國富兵強須是分諸路為六段六曹尚書領之諸州有事只經諸曹尚書奏裁取旨又每一歲或三歲使一巡歷庶幾下情可達文公曰若廣中西川之類使之巡歷則本曹必有廢弛之患陳曰劇曹則所領者少若路

遠則兵工可為也文公曰此亦是一說
監司薦人後犯贓罪須與他鑄三五資正郎則降為真郎真郎則降為承議郎以下若已為侍從或無職名可鑄則鑄其俸或一郊不與奏薦如此方始得他痛恁地也須怕今都不換他一毫前輩說話可法其嘗見吳丈公路云他作縣不敢旬假一日假則積下一日事到底自家用做轉添得繁劇則多踈率不子細豈不害事
恢復之計須是自家喫得些辛苦少做十年或二十年多做三十年豈有安坐無事而大功自致之理哉
某嘗謂恢復之計不難惟移浮糜不急之費以為養兵之資

壽皇合下若有人夾持定十五六年做多少事
其甫再為潭帥律已愈謹馭吏愈嚴某謂如此方
是

今諸路帥臣只曾作一二任監司即以除之有警
則又欲其親督戰士此最不便萬一為賊所虜
為之奈何彼固不足恤失一帥其勢豈不張大
前輩謂是祖宗用帥取以二路一是曾歷邊郡
一是帥臣子弟曾諳習邊事者此最有理或謂
戎幕宜用文臣三四員此意亦好蓋經歷知得
此等利害向後皆可為帥然必須精選而後任
不可泛濫也

某嘗謂今做監司不如做州郡做州郡亦如做一
邑事體却由自家監司雖大於州州雖大於邑

然事都被下面做翻了上面如何整頓
蜀遠朝廷萬有餘里擇帥須用嚴毅素有威名足
以畏壓人心則喜亂之徒不敢作矣
為稅官若是父兄宗族舟船過只得稟白州府請
別委官檢稅豈可直放去所以祖宗曾立法
許相回避又曰臨事須是分毫莫放過如某
當官或有一相識一親戚之類如此越自分明
不肯放過

屯田須是分而屯之統帥屯某州總司屯某州漕
司屯某州屯田即以戶部尚書為屯田使使各
考其屯之多少以為殿最則無不可行者今則
不然每欲行一文字則經由數州僉押各相牽
制事何由成

吾輩今經歷如此異時若有尺寸之柄而不能爲
斯民除害去惡豈不誠可罪耶某嘗謂今之世
姑息不得却直須共他理會庶幾善弱可得存
立
辛亥歲文公在臨漳正月十三日下學坐定職事
講書畢曰郡守以承流宣化爲職不以簿書財
計獄訟爲事某自到此未知人物賢否風俗厚
薄今已九月矣知得學校底蘊遂欲留意學校
採訪鄉評物論延請黃知錄見他有恬退之節
欲得表率諸生又延請前輩數人入學欲同表
率使士人識些向背稍知爲善之方與一邦之
人共趨士君子之域仰體朝廷教養作成之美
意不謂作之不應弄得來都沒合殺了教授受

朝廷之命分教一邦其責任不爲不重合當自
行規矩而今容許多爭訟職事人在學枉請了
官物都不成學校士人先要識箇廉退之節禮
義廉耻是謂四維而今都寡廉鮮耻了雖能文
要何用某雖不肖深爲諸君耻之
或謂諸公論置二大帥以統諸路之帥如何曰不
消如此只是擇得一箇人了君相便專意委任
他却使之自擇參佐事便歸一今若更置大帥
以監臨之少間必有不相下之意徒然紛擾須
是得一箇人委任他聽他自漸漸理會許多軍
政將來自有理
論財賦曰財用不足皆起於養兵十分八分是養
兵其他用度只在二分之一之中古者刻剝之法如

本朝皆備所以有靖康之亂已前未有池揚江
鄂之兵止張宜撫兵其人只今增添許多兵各
當精練禁兵汰其老弱以爲廂兵
胡侍郎言吏人不可使他知我有恤他之意此說
極好又曰小處可恤大不可恤
勉齋言廖子晦作宰不廷參當時忤了上位但此
一節最可服曰廷參底不是然待上位來爭到
底時也不是一人
黃仁卿將宰萬安論及均稅錢曰今說道稅不出
鄉要之稅有輕重如何不出鄉得今若是教稅
不出州時庶稍均得文公曰稅不出鄉只是古
人一時間尋得這說去防那一時之弊而今耳
裏聞得却把作大說話但只均稅錢也未盡須

是更均稅物方得且如温州納稅一錢可以當
此間十錢如今須是均那稅物又曰往年在
漳州是有退稅者不是一發退了謂如春退了
稅後秋又要退苗却不知別郡如何然畢竟是
名目多後恁地據某說時而今只是教有田底
出米有地底出絹只作兩鈔官司亦作一倉一
場如此百姓與官司皆無許多勞獲

三十年一番經界方好又曰元稹均田圖惜乎不
見今將他傳來考只有那兩疏却無那圖然周
世宗一見而喜之便欲行想見那圖大段好嘗
見陸宣公奏議後面說那口分世輩其織悉畢
盡古人直是恁地用心而今人若見均田圖時
也須是只把作鄉司職事看了定是不把作書

讀而今如何得有箇陸宣公樣秀才
文公曰林勳本政書每鄉開其若干字號田田注
人姓名是以田爲母人爲子說得甚好
而今史官不相總統只是各自去書書得不是人
亦不敢改更是他書了亦不將出來據他書放
那裏知他是與不是便是他今雖有那日曆然
皆兼官無暇去修得而今須是差六人鎖放那
裏教他專一去修方得如近時作那高宗實錄
却是教一人當一年這也不得且如這一事頭
在去年尾在今年那書頭底不知尾那書尾底
不知頭都不成文字而今如立傳其常時來看
說得詳底又都只是馮那行狀其略底又恰如
春秋樣更無本末可攷或有差除去了底這一

截又只休了如何地替考據某看來須合分作
六項人管一事謂如刑事便去關那刑部文字
看他那用刑皆有年月恁地把來編類便成次
序那五者皆然俟編一年成了却合歛來如元
年五月一日有某事這一月內事先後便皆可
見且如立傳他那日曆上薨卒皆有年月在這
當印板行下諸州索那行實墓誌之屬來却令
運司更即差一人督促史院却去督促運司有
未到底又割下去催來恁地便編得成箇文字
而今實錄他門也是將日錄做骨然却皆不曾
着實用心有時考不得後將一牒下州縣去討
那州縣不成也不管恁地如何解有理會
一朋友言某官失了稅簿曰此豈可失了此是根

本無這箇後如何替考所以周公建官便皆要
那史所謂史便是掌管那簿底補會
今世產賦百幣砒墓簿只以戶私本在官中本天
下無一處有稅賦本末更無可稽尋處皆不曾
福建賦稅猶易辨浙中全是白撰橫斂無數民不
聊生丁錢至有二千五百者由此人多去計會
中使作宮中名字以免稅向見辛幼安說糞船
亦插黃旗子其初不信後提舉浙東親見其事
嘗有人充保正來論某當催秋稅某人當催夏
稅某怪之以爲催稅只一般何爭夏稅從而問
之乃知秋稅苗產有定爲是催夏稅是和買絹
最爲重苦蓋始者一定官支得六百錢後來變
而令人先納絹後請錢已自費力了後又無錢

可請只白納絹今又不納絹只令納價錢其數
又重催不到者保正坐之一番當後則爲之困
矣故福建不如江西江西不如江東江東又不
如浙東浙東不如浙西越近都越不好
某嘗謂而今江浙間除了和買丁錢重處減些少
使一家但納百十錢只依而今稅賦後放教寬
着如此時便是小太平前輩嘗言本朝稅輕於
什一而今何啻數倍緣上面要許多用今縣中
若省解小月椿州府定來打罵某在漳州解發
銀子折着星兩運司也發文字下來取被某也
知州兩任知州有關陞方得爲提刑又有一節
方得爲轉運今仕宦者欲免州縣之勞皆經營
六院既爲六院便可經營寺監簿丞爲寺監簿

丞出來便可得州郡他又不肯作郡便欲經營
郎官郎官非作郡不得除故又經營權郎官却
自權郎官經營卿監長貳則已在正郎官之右矣
又如法中非作縣不得作郡故不作縣者必經
營臨安俸既為此俸則必得郡更不復問先曾
為縣否也人君深居九重安知外面多曲折宰
相雖知又苟且應副親舊若人君得知須與除
去這般體列苟不作縣雖為臨安俸亦不免便
權卿監苟不作郡定不得除郎為卿監者亦須
已作郡人方得做不得以寺監丞簿等官權之
則人無僥倖之心矣只緣當初立法不肯公心
明白留得這般掩頭藏俸底路徑所以使人趨
之嘗記歐公說舊制觀文殿學士歷資政殿學

士後來改觀文兩學士都歷資政殿學士初議
者見任者難為改動歐公以為此不難已任者
勿改而自今除者始可也以今觀之何須如此
將是任者改定又何妨不過寫換數字而已而
當時疑慮顧忌如此只緣自來立法建事不肯
光明正大只是委曲回護其弊至於今日略欲
民之產己自不是民自去買田又更去收牙稅
是甚說話古人禁民聚歛今却張官置吏惟恐
人不聚歛如此却何以責人廉遜
文公曰某在漳州有訟田者契數十本自崇寧起
來事甚難考其人將正契藏了更不可理會某
但索四畔眾契比驗四至昭然及驗前後所斷
情偽更不能逃者

嘗有官人斷爭田事被其掇了案其官人却來那
穿款處考出與他研窮道理分別是非曲直
壽皇初要令官戶作保正其時將侍郎作保正遂
大書保正蔣芾後來此令竟不行
或病訟牒之多曰與他研窮道理分別是非曲直
自然訟少若厭其多不與分別則愈見多事
而今採荒甚可笑自古採荒只有兩說第一是感
召和氣以致豐穰其次只有儲蓄之計若待他
飢餓時理會更有何策東邊遣使去賑濟西邊
遣使去賑濟只討得遂州幾箇紫綾冊子云某
處已如何措置某處已如何經畫元無實惠及
民因問向來先生措置如何文公曰亦只是討
得紫綾冊子更有何策

為學是自博而反之約為治是自約而到其博
問差役雀役孰優曰互有得失今所謂雀役便者
即謂不擾稅人然聚浮浪無根着之人在那裏
又多害事所謂差役便者即謂稅人自顧藉愛
惜然其為之者多有破家蕩產之患蓋緣既作
他衙前少間庫厨却教他管他自備這物事以
供應官負大有不便如祖宗時却有坊場河渡
以補之謂之優重也
客有說社倉訟事曰如今官司鶻突無理會委送
官屬不知可否更無分曉某在潭州時州中僚
屬朝夕相見却自知得分曉只縣官無由知得
後來區處每月版帳錢令自輪次解來當日留
住談以公事又怕他鶻突馬來却為立下格式

云今蒙使府委送某事如何一某人於某年某月日於某處理某事某州如何斷一又於某時於某處再理某官如何斷一某今看詳此事理如此於條合如何結絕如此人之能否皆不得而隱
今科舉之幣極矣如鄉舉里選之法此是第一義今不能行只是就科舉法中與之區處且變着如今經義格于使天下士子各通五經大義一舉試春秋一舉詩三禮一舉試易詩書禁懷挾出題目馮出注疏與諸家之說而斷以己意策論則試以時務如禮樂兵刑之屬如此亦不爲無益欲革奔競之弊則均諸州之解額稍損太學之額太學則罷月書季考之法皆限之以省

試獨取經明行脩之人如此庶幾矣

頃嘗欲因奏對言一事而忘之諸州軍兵衣絹或非本州所有則以土供錢對易於出產州軍最爲頰擾如潭州舊與信處二州對易每歲本州爲兩州抱認上供錢若干盡數解納而兩州絹絕不來太守歲遣書饋懇請恬不爲意或得三分之一間發到一半極矣然絹紕薄而價高常恐軍人怨詈喊噪以錢貼支始得無事歲以爲苦興化取之台州更是回遠此事最難理會如漳州不出絹信處二州有之何不令兩州以所合發納上供錢輸絹左藏只令漳州以錢散軍人豈不兩便軍人皆願得錢蓋絹價每三千省而請錢得五千省故也此亦當初立法委曲

勞穰之過改之何妨
自秦置守尉監漢有郡守刺史刺史如今之監司
專主按察至漢亦令刺史掌兵遂侵郡守之權
兼治吏事而刺史之權獨重後來或置或否某
嘗說不用許多監司每路只置一人後刺史之
職正其名曰按察使令舉刺州縣官吏其下却
置判官數員以佐之如轉運判官刑獄判官農
田判官之類農田專主糶田轉運專主財賦刑
獄專主盜賊刑獄則刺史總之猶重諸判官之
權資叙視通判而刺史視太守判官有事欲奏
聞則刺史為之發奏刺史不肯發則許判官自
經申御史臺尚書省以分刺史之權蓋刺史之
權獨專則又不便若其人昏濁則害貽一路百

姓無出氣處故又須略重判官之權諸判官下
却置數員屬官如職幕官之類如此則事權歸
一太守自治州事而刺史得舉刺一路豈不簡
徑省事而無侵擾耗蠹之弊乎問今之主管
資格亦視通判文公曰然但權輕不能有所為
只得奉承運使而已若分為判官俾得專達則
其權重而監司亦不敢妄作矣
程子曰為政須要有綱紀文章謹權審量讀法平
價皆不可闕所謂文章者便是文飾那謹權審
量讀法平價之類
今之法家惑於罪福報應之說多喜出人罪以求
福報夫使無罪者不得直而有罪者得倖免是
乃所以為惡爾何福報之有書曰欽哉欽哉惟

刑之恤哉所欽恤者欲其詳審曲直令有罪者
不得免而無罪者不得濫刑也今之法官感於
欽恤之說以為當寬人之罪而出其死故九罪
之當殺者必多為可出之塗以候奏裁事多減
等是乃賣弄條法而受賕者耳初何欽恤之有
今之律令謂法不能決者則候奏裁今乃明知
其罪之當死亦莫不為可生之塗以生之惟獨
壽皇不然其情理重者皆殺之官於此
而今官負不論大小盡不見客敢立定某日見客
某日不見客甚至月十日不出不知甚麼條貫
上如此是禮乎法乎可怪不知出來與人相應
接少頃有甚辛苦處使人之欲見者等候不能
得見或有急幹欲去有甚心情等候欲吞不可

欲吐不得其苦不可言此等人所謂不仁之人
心都頑然無知抓着不痒搔着不痛矣小官下
位嘗被此位如此而非之矣及至他榮顯又自
不知矣因言黃漕每日先見過往人客了然後
請職事官相見蓋恐幕職官稟事多時過客不
能久候故也某在潭州見前後初一十五例不
見客諸司皆然某遂破例令皆相見又文公在
潭州每日一詣學士人見於學中官負見於府
署中代司文公見於學中官負見於府
平易近民為政之法外其法甚善朝廷
當官文書簿曆須逐日結押不可拖下
前輩檢驗皆有書當官者不可不知○極多樣
彭仲剛子復作台州臨海縣理會役法甚善朝廷

措置役法看如何措置終是不公且如鄉有寬
而狹寬鄉富家多狹鄉富家少狹鄉富家斬斬自
足一被應役無不被家蕩產極可憐憫彭計一
平縣有幾鄉鄉有闊狹其鄉多富家某鄉少富家
却中分富家以界兩鄉令其均平其有不均處
則隨其道理遠近分割裨補令其恰好人甚便
之雖非法令之所得為然使民宜之亦終不得
不變也
役法所在不同看來只用倍法若產錢滿若干當
為保正外又計其餘產滿若干當為保長若產
錢倍多則兩番為保正如如此則無爭又有所在
利於為保正不利為保長者非通四方之風俗
情偽如何了得

今之為相者朝夕疲精神於應接書問之間更何
暇理會國事世俗之論遂以此為相業有一人
焉略欲分別善惡杜絕干請分諸闕於部中得
以免應接之煩稍留心國事則人爭非之矣
某嘗說今世之士所謂巧者乃是大拙無有能以
巧而濟者都是枉了空費心力只有一箇公平
正大行將去其濟不濟天也只有一箇正其誼
不謀其利明其道不計其功其他費心費力用
智用數牢籠計較都不濟事都是枉了
溫公作相日有一客位榜分三項云訪及諸君若
觀朝政闕遺庶民疾苦欲進忠言請以奏牘聞
於朝廷某得與同僚商議擇可行者取旨行之
若但以私書寵諭終無所益若光身有過失欲

賜規正則可以通書簡分付吏人傳入光得內
自省訟佩服改行至於理會官職差遣理雪罪
名九干身計並請一而進狀光得與朝省衆官
公議施行若在私第垂訪不請語及此皆前輩
做契

有旨令諸縣造船召匠計之所費甚鉅有請教於
張直柔者張曰此事甚易可作一小者計其丈
尺廣狹長短即是推之則大者可知後所費十
減三四〇勉齋築城亦先自築一料計其所費亦
用此法

勉齋先生語錄類要卷第十二
勉齋先生語錄類要卷第十二

勉齋先生語錄類要卷第十三

科舉

包顯道言科舉之弊曰如他經尚是就那文義上
說最者春秋不成說話多是求言外之意說得
不是模樣某謂此皆是侮聖人之言却不如王
介甫索性廢了較強文公又笑曰嘗有一人作
時變通論皆說要復古至論鄉舉里選却說要
須敬三十年科舉後却行要待那種子盡了方
行得說得來也是

文公因說舉業笑曰某年少時只做得十五六篇
義後來只是如此發解及第人但不可不會作
時文及其得也只是如此今人却要求爲必得

豈有此理或問父母責望不可不應舉作時文又有穿鑿之患不審當如何文公曰略用體式而彙括以至
科舉累人不淺人多為此所奪但有父母在仰事
俯育不得不資乎此故不可不勉爾其實甚奪
人志學者以書謁文公有棄科舉之說文公曰今之士大夫應舉干祿以為仰事俯育之計亦不能免公生事如何曰粗可伏臘曰更須自酌量

刑法

或問本朝之刑與古雖相遠然也近重如不甚輕
刑役人之類曰也是但律較輕勅較重律是從古

來底勅乃是本朝底而今用時勅之所無方且
用律本朝自徒以下罪輕古時流罪不刺面只
如而今白面編管自唐五代方是黥面決脊如
折杖却是自太祖方創起這却較寬
問律起何時曰律是從古來底逐代相承修過今
也無理會了但是而今那刑統便是古律下面
注底便是周世宗造如宋荅公所謂應從而違
堪供而缺此六經之亞文也所謂律者如漢書
所引律便是但其辭古難曉如當時數大獄引
許多辭便如而今之款引某罪引某法為斷後
本朝便多是用唐法
問五刑不贖之意曰是穆王方有贖法嘗見蕭望
之言古不贖刑其甚疑之後來方省贖刑不是

古
問勅令格式如何分別曰此四字乃是神宗朝定
法令時綱領也本朝止有編敕後來命羣臣脩
定元豐中執政安燾等上所定敕令上諭燾曰
設於此而逆彼之至謂之格設於此而使彼效
之謂之式禁於未然謂之令治其已然謂之敕
脩書者要當知此蓋神宗天資絕人觀此數語
極是分別得好格如五服制度某親當某服某
服當某時各有限極所謂設於此而逆於彼之
至之謂也式如磨勘轉官求恩澤封贈之類只
依箇樣子寫去所謂設於此而彼效之之謂也
今則條令禁制某事不得為某事違者有罰之
類所謂禁於未然者敕是已結此事依條斷遣

之類所謂治其已然者格式令在前敕在後則
有教之不改而後誅之之意令但欲尊敕字以
居前令格式在後則與不教而殺者何異殊非
當時本旨

處變○權變附

蔡季通被罪臺評及文公文公劄罷起樓下西序
行數回即中位打坐葉賀孫遂歸精舍告諸友
輔漢卿筮之得小過公弋取彼在穴曰先生無
虞蔡所遭必傷即同輔萬季弟至樓下文公坐
睡甚酣因諸生偶語而覺即揖諸生諸生問所
聞蔡丈事如何曰州縣捕索甚急不曉何以得
罪因與萬正淳說早上所問孟子未通處甚詳
繼聞蔡已遵路防衛頗嚴諸友急往中途見別

文公舟往不及聞祭留邑中皆詹元善調護之
文公初亦欲與經營包顯道因言禍福已定徒
爾勞擾文公嘉之且云顯道說得自好未知當
局如何是夜諸生坐樓下圍爐講問而退後聞
祭編管道州乃沈繼祖文字主意詆文公也一
日文公往靖安寺候蔡蔡自府乘舟就賤過靖
安文公出寺門接之坐僧方丈寒暄外無嗟勞
語以連日所讀參同契所疑扣蔡蔡應荅洒然
少待諸人釀酒至飲皆醉文公間行列坐寺前
橋上飲回寺又飲先生醉睡

或問周都豐鎬則王畿之內當有西北之戎如此
則稍甸縣都如之何其可爲也文公曰周禮一
書聖人作爲一代之法爾到不可用法處聖人

須別有權變之道

子畏於匡顏淵後子曰吾以汝爲死矣如何文公
曰孔子恐顏淵遇害故有此語顏子荅曰子在
回何敢死者顏子謂孔子既得脫禍吾可以
死矣若使孔子遇害則顏子只得死救之也或
問顏路在顏子許人以死何也曰事偶至此只
得死此與不許友以死之意別不許以死在未
處難以前乃可如此處已遇難却如此說不得
有人問尹彥明會有南子子亦見之乎曰不敢見
他曰聖人何爲見之曰須磨不磷涅不緇則見
之不妨
問父死非其罪子亦可仕否曰不可孫曾如何曰
世數漸遠終是漸輕亦有可仕之理但不仕者

正也可仕者權也
儀刑
文公每待行報謁步速而意專不左右顧及無事
領諸生出則徘徊顧瞻緩步微吟
文公有疾諸生省問必正冠坐揖各盡其情略無
倦接之意諸生有未及壯年者待之亦周詳
文公病少愈既出寢室客至必見見必降階肅之
去必送至階下
諸生夜聽講退不送或有客則降階送之文公於
客退必立視車行不復顧然後退而解衣及應
酬他事或客方登車猶相面或有以他事稟者
不領之或前客纔發車而尚留之客輒有所稟
議亦令少待

文公對客語及本監司守將必稱其官
文公有疾不出令諸生入卧内相見云某病此番
甚重向時見文字也要議論而今都怕了諸友
可自努力全靠某不得
黃直卿勸文公且謝賓客數日以養疾文公曰天
生一箇人便須管天下事若要不管須是如楊
氏爲我方得某又却不曾去學得這般學
有學者每相揖畢則縮左手袖中文公曰公常縮
着一隻手是如何似不是舉止模樣
衣服當適於體康節向溫公說某今日當着今時
之服亦未是
文公於父母墳墓所託之鄉人必加禮或曰敵已
以上拜之

文公病或勸晚起曰某自是不能晚起雖甚病纔見光亦便要起尋思文字纔稍晚起覺似冥安醜毒便似箇懶惰底人心裏便不安須是早起了却覺心下鬆爽或人勸文公當此之時宜略從時文公荅之曰但恐如草藥煨煉得無性子救不得病耳說話須一字是一字一句是一句便要見是非孔子曰聽其言也厲六下事皆不某尋常莫說前輩只是長上及朋友循循說道理底便不敢說他說得不是且將他說去研究又自家曉得却說得不是某尋常最居人後又文曰某尋常最得此力人每常令兒子門作事只是說大綱與他以為那小

小處置也易曉不須說也得後來做得不滿天意處未有不由那些子不要區處起文公文公令小童添炭撥開火散亂文公曰可拂斂了我不要人恁地因謂諸生曰此便是燒火之不敬所以聖人教小兒洒掃應對件件要謹某外家子姪未論其賢否如何一出來便齊整緣是他家長上元初教誨得如此只一人外居氣習便不同

警戒○鑒誠附文公

文公荅呂子約書曰月下蹉過了合做底親切工夫虛度了難得少壯底時日不可倚靠師友又曰某不敢自昧實以銖累寸積以得之又曰不可等待又曰須是有頭有尾成

箇物事不可涉其波流即休又曰學者須耐煩
不耐辛苦耐文字一其不_自和實心_務累_上楚
九是名利之地自家退以待之便自安穩纔要只
夫管向前便危險曰日不知_也合_也處_也工
門人有與人爭訟者文公責之曰欲之甚則昏蔽
而忘義理求之極則爭奪而至怨仇
文公謂葉賀孫曰也只是莫巧公鄉間有時文之
習易得巧_其習_否以_一出_來野_齊整_然
文公病諸生功夫悠悠曰今人做一件沒緊要底
事也着心去做方始會成如何悠悠會做得事
且如學寫字底人念念在此則所見之物無非
是寫字底道理又如唐賈島學作詩只思推敲
兩字在驢上坐只把手作推敲勢太守出有許

多車馬人從渠更不見不覺犯了節只此二字
計甚利害他直得恁地用力所以後來做得詩
亦極是精高吾人學問是小事小事却今悠悠
若存若亡更不着緊用力反不如他做得緊要
可謂倒置諸公切宜勉之

文公因泛言交際之道曰先人嘗有雜錄冊子記
李仲和之租○見居三衢與包孝肅同讀書一僧
舍每出入必經由一富人門二公未嘗往見之
一日富人侯其過門邀之坐二公托以他事不
入他日復招飯意勤甚李欲往包公正色與語
曰彼富人也吾徒異日或守鄉郡今妄與之交
豈不為他日累乎竟不往後十年二公果相繼
典鄉郡文公因嗟歎前輩立已接人之嚴蓋如

此方二公爲布衣所志已如此此古人所謂言
行必誓其所終慮其所幣也或言有爲鄉邑者
泛接部內士民如布衣交甚至狎昵後來遇事
入手頗有掣肘處文公曰爲邑長此等事當有
限節若脫略繩墨末流之幣必至於此包李之
事可爲法也
進取得失之念放輕却將聖賢格言處研窮考究
若悠悠地似做不做如捕風捉影有甚長進今
日是這箇人明日亦是這箇人
季繹勸蔡季通酒止其泉南之行蔡決於文公文
公笑而不荅良父曰身勞而心安爲之利少而
義多者爲之

文公因問諸生庚甲既而曰歲月易得後生不覺

老了

文公曰某自十六七時下工夫讀書彼時四畔無
津涯只自恁地硬着力去做至今日雖不足道
但當時也是喫了多少辛苦多讀了書今人卒
乍便要讀到某田地也是難要須積累着力方
得某今老而將死所望者但欲朋友勉力學問
而已

教導後進須是嚴毅然有以興起開發之方得只
恁嚴徒拘束之亦不濟事
人之生不幸不聞過大不幸無耻此兩句只是一
項事知耻是由内心以生聞過是得之於外人
須知耻方能聞過而改故耻爲重
文公曰某老矣無氣力得說○因病看也看不得了

言行也行不盡了說也說不辨了諸公勉之
文公曰某見今之學者皆似箇無所作爲無所圖
底人相似人之爲學當如救火追亡猶恐不及
如自家有箇光明寶藏被人奪去尋求趕捉必
要取得始得今學者只是悠悠地無所用心所
以兩年三年五年七年相別再來相見只是如
此
三十年前長進三十年後進得不多
財猶膩也近則汚人豪傑之士耻言之
有侍坐而困睡者文公責之李敬子曰僧家言常
常提起此志令堅強則坐得身直亦不昏困才
一縱肆則嗒然頽放矣文公曰固是道家修養
亦怕昏困常要直身坐謂之生腰坐若昏困倒

靠則是死腰坐矣因舉小南和尚少年從師參
禪一自偶靠倚而坐其師見之叱曰得恁地無
脊梁骨小南憤然自此終身不靠坐又舉徐處
仁太宰知北京日早晨會僚屬治事訖復穿秉
會坐設廳上徐多記覽多說平生履歷州郡利
害政事得失及前言徃行終日危坐僚屬甚苦
之嘗暑月會坐有秦兵曹瞌睡徐厲聲曰某在
此說話公却瞌睡豈以某言爲不足聽耶未論
某是甚官只論鄉曲亦是公文人行安得如此
叫客將取秦兵曹坐倚子來
問色容莊最難曰心肅則容莊陳才卿因說九容
汝早見文公才卿以右手拽涼衫左袖口偏於
一邊文公曰夜來說手容恭公如此才卿赧

然急入手鞠躬曰忘了又公笑曰爲己之學有
忘耶向徐節孝初見胡安定退頭容少偏安定
厲聲云頭容直節孝自思不特頭容要直心亦
要直自此更無邪心學者須是如此方得

出處

問孟子不見諸侯召之則不往見之何也曰且如
孟子將朝王王使人來曰寡人如就見者也有
寒疾不可以風朝將視朝孟子本待要去見他
才見來喚召便稱疾不肯往蓋孟子以賓師自
處不可召之也故曰古者不爲臣不見又曰欲
有謀焉則就之又曰迫斯可以見矣皆此意也
或問孔子當孟子時如何曰孔子自有作用然亦
須稍加峻厲又問孔子若見用顏子亦出否曰

孔子若用顏子亦須出來做他次一等人

有一朋友微諷文公云先生有天生德於予底意
思却無微服過宋之意文公曰某又不曾上書
自辯又不曾作詩謗訕只是與朋友講習古書
說這道理更不教做却做何事因曰論語首章
言人不知而不愠不亦君子乎斷章言不知命
無以爲君子今人開口亦解說一飲一啄自有
定分及過小小利害便生趨避計較之心古人
刀鋸在前鼎鑊在後視之如無物者蓋緣只見
得這道理却不見那刀鋸鼎鑊又曰死生有命
如合在水裏死須是溺殺此猶不是深奧底事
難曉底話如今朋友都信不及覺見此道日孤
令人意思不佳

論進以禮退以義曰三揖而進一辭而退

文公曰大抵觀聖人之出處須看他至誠懇切處及洒然無累處文中子說天下皆憂吾獨得不憂天下皆疑吾獨得不疑又曰窮理盡性吾何疑樂天知命吾何憂此說是

甲寅年孫自脩見文公曰先生難進易退之風天下所共知今新天子嗣位乃幡然一來必將大有論建文公笑曰只爲當時不合出長沙在官所有召命又不敢固辭孫又曰今既受了侍從職名却不容便去文公曰正爲如此又笑曰若病得狼狽時也只得去

問龜山何意出來曰龜山做人也苟且是時未免祿仕故胡亂就之首可以少行其道龜山之志

也然來得已不是及至又無可爲者只是說沒也然來得已不是及至又無可爲者只是說沒緊安底事當此之時苟有大力量出嗟間真能轉移天下之事來得也不枉既不能然人只是隨衆鵬笑及至欽宗即位爲諫議大夫因爭配享事爲孫仲益所攻孫言楊其襄與蔡京諸子遊今衆議攻京而楊某曰慎毋攻居安○京長子攸也云云龜山遂罷又曰蔡京當國時其所收拾招引非止一種諸般名色皆有及乎淵聖即位任朝諸人盡攻蔡京且未暇顧國家利害朝廷若索性貶京過嶺也得一事了今日去幾宮分司西京明日去幾官又移某州後日又移某州至潭州而京病死自此一年間只理會得一

箇蔡京這後面光景迫促了金人之來已不可
過京有四子攸條條條條尚主魯以書諫其父
徽宗怒令京行遣一家弄得不成模樣更不堪
說攸條後被斬是時王黼童貫梁師成輩皆斬
此數人嘗欲廢了欽宗故欽宗平日不平之故
也後來高宗初立猶未知辯別元祐熙豐之黨
故用汪伯彥黃潛善不成人才汪黃又小人中
之最下最無能者及趙丞相居位方稍能辯別
亦緣孟右居中力與高宗說得透了

晦菴先生語錄類要卷第十三

晦菴先生語錄類要卷第十三

晦菴先生語錄類要卷第十四

勉齋黃先生門人括蒼葉士龍編次

學術

文公曰涵養窮索二者不可偏廢如車兩輪如鳥

兩翼如溫公只恁行將去無致知一段

格物二字最好物猶事也須窮格事物之理到盡

處便有一箇是一箇非是底便行非底便不行

凡自家身心講論文字應接事物各各體驗漸

漸推廣地步自然寬闊如曾子三省只管如此

體驗去皆須體驗得一箇是非

格物二字聖人是要人就事物上理會且自一念

之微以至事事物物若靜若動凡居處飲食言

語無不是事無不有箇天理人欲逐一驗過雖

在靜處須驗箇敬肆敬是天理肆是人欲在處便驗恭與不恭執事須驗敬與不敬人有專就寂然不動上理會遇事則七顛八倒有人專就事上理會於根本上全無功夫須是徹上徹下表裏洞徹如居仁便自能由義由義便是居仁敬以直內便能義以方外能義以方外便是敬以直內

今讀語孟不可便道精義都不是都廢却須借他做箇階梯去尋求將來自見得道理知得他是非方是自己所得處要辯得他似是而非處須以義理栽培用功夫之自能辯得

且窮實理令有切己工夫若只泛窮天下之理不務切己即是遺書所謂遊騎無所歸矣

須培植本根令豐壯以此去理會學問如三代以下書古今世變治亂存亡皆當理會

廖子晦言山居頗適讀書罷臨水登山覺得甚樂

文公曰只任閑散不可須是讀書又言上古無閑民其說甚多不曾記錄大意似謂閑散是虛樂不是實樂

文公曰學者須是有業次且如讀堯舜典曆象日月星辰律度量衡五樂五禮之類禹貢山川洪範九疇須一一理會令透又如禮書冠昏喪祭王朝邦國許多制度逐一講究今人只做得西漢以下工夫無人就堯舜三代原頭處理會來又曰且如做舉業亦須苦心理會文字方可決科讀書若不苦心去求不成業次終不濟事

問戒謹恐懼以此涵養固善然行之於事所謂開
物成務之幾當如何文公曰此却在博文此事
獨脚做不得須是讀書窮理又曰只是原頭正
發處自正只是這路子上性來
呂伯恭自言少時多愛使性氣纔且使令者不如
意便躁怒後讀論語至躬自厚而薄責於人遂
更不復如此
博文約禮聖門教人只此兩事須是互相發明約
禮底工夫深則博文底工夫愈明博文底工夫
多則約禮底工夫愈密矣

文公嘗謂輔廣曰且自做工夫學者最怕因循莫
說一下便要做成今日知得一事亦得行得一
事亦得只不要間斷積累之久自解做得徹去

若有疑且須自去思量不要倚靠人待去問若
無人可問時不成便休人若除得箇倚靠人底
心學也須會長進

後人讀書多於無捉摸處用工某舊日理會道理
亦有此病後得李先生說令去聖經中求義某
後來刻意經學推見實理始信前日諸人之誤
也

初學須是自處於無能遵稟前輩說話漸見實處
大抵中年以後為學且須愛惜精神如其在官
所亦不敢屑屑留情細務正恐耗了精神忽有
大事來則無以待之也

要於聖賢語上精加攷究從而分別輕重辯明是
非見得粲然有倫是非不亂方是所謂文理密

察自此應事接物各當事幾而不失之過不失之不及此皆精於義理之效也
文公曰須是精攻而躬行之使九一言一行皆出乎此理則這邊自重所謂仰不愧俯不怍浩然之氣亦從是生若用工如此方有進處若如此進時一齊俱進聖賢見處雖卒未可遽盡然進進不已隨力量自當有到處

讀書須讀到不忍捨處是方見得真味若讀之數過略曉其義即厭之欲別求一書則是於此一卷書猶未得趣也舊日讀書方其讀論語時不知有孟子方讀學而第一不知有為政第二今日看此一段明白更且看此一段看來看去直待無可看方換一段看又自然洞貫方為浹洽

今時下雖是鈍滯便一件了得一件將來却有盡理會得時若撩東搭西徒然看多事事不了日暮途遠將來荒忙不濟事舊日見李先生說理會文字須令一件融釋了後方更理會一件融釋二字下得極好亦是真曾經歷來便說得如此分明

經之有解所以通經經既通無事於解借經以通乎理耳理得則無俟乎經今意思只滯在此則何時得脫然會通也某嘗說讀書須細看得意思通融後都不見注解但見正經幾箇字方好又曰且如大學一書有正經有解有或問看來看去不用或問只看注解又只看正經又久之自有一部大學在我胸中而正經亦不用

矣然不用其許多工夫亦看他底不出不用聖賢許多工夫亦看聖賢底工夫不出未須理會他經先於論語孟子中專意看他切不可忙虛心視之不須先自立見識徐徐以俟之莫立課程某二十年前得上蔡語錄觀之初用銀硃畫出合處及再觀則不同矣乃用粉筆三觀則又用墨筆數過之後則全與元看時不同矣

看文字須虛心玩理今且以小說明之有一人欲學相氣色其師與一串五色絲令入暗中認之云辯得此五色出方能相氣色也看聖人意旨亦是如此精專方得之到自得處不從說來今之學者本是困知勉行底資質却要學他生知

安行底工夫便是生知安行底資質亦用下困知勉行工夫况是困知勉行底資質

大抵學問須先警省且如瑞巖和尚每日常自問主人翁惺惺否又自答曰惺惺今時學者却不能如此

程子說窮理却謂不必盡窮天下之理只是理會得多後自然貫通

義理身心所自有失而不知所以復之富貴身外之物求之惟恐不得縱使得之於身心無分毫之益况不可必得乎若義理求則得之能不喪其所有可以為賢為聖利害甚明人心之公每為私欲所蔽所以更放不下但常常以此兩端體察若見得時自須猛省急擺脫出來

知行常相須如目無足不行足無目不見論先後
知爲先論輕重行爲重
脩身大法小學備矣義理精微近思錄詳之
學者須是爲己聖人教人只在大學第一句在明
明德上以心立心則如今端已歛容亦爲己也
讀書窮理亦爲己也做得一件事是實亦爲己
也聖人教人持敬只是須着從這裏說起其實
若爲己後自然着敬又曰學者只是不爲己故
日間此心安頓在義理上時少安頓在閑事上
時多於義理却生於閑事却熟
聖賢事迹一一可考而行若舍六經之外求所謂
玄妙之說則無之
如今要緊只是將口讀底便似身行底說出底便

是心存底
大九人要說去從師然未及從師之時也須自着
力做工夫及六七分到得聞緊要說話易長進
若是平時不曾用力終是難從頭下手
今須先正路頭明辯爲己爲人之別直見得透却
旋旋下工夫則思慮自通知識自明踐履自正
積日累月漸漸熟漸漸自然若纔不透路頭錯
了則讀書雖多爲文日工終做事不得比見浙
間朋友或自謂通左傳通史記將孔子置在一
壁却將左氏司馬遷之文鑽研推尋謂這箇是
盛衰之由這箇是成敗之端反而思之于你身
已甚事你身已有多少底事合當理會有多少
病痛未曾去却來說甚盛衰興亡治亂這箇直

是自欺
 學習須只管在心常常習若習得專一定是脫然
 通解
 問橫渠言十五年學恭而安不成明道曰可知是
 學不成有多少病在文公曰人便是被一箇氣
 質局定變得些子了又更有些子又云聖人發
 憤忘食樂以忘憂發憤便忘食樂便忘憂直是
 一刀兩段千了萬當聖人固不在說但顏子得
 聖人說一句直是傾腸倒肚便罷了更無許多
 廣纖纏繞絲來線去問橫渠只是硬把捉故不
 安否文公曰他只是學箇恭自驗見不曾熟不
 是學箇恭又學箇安
 為學須是理會到十分是始得如人射一般須是

要中紅心如今直要中的少間猶且不中的若
 只要中帖中垛少間却是胡亂發枉了氣力二
 百步外去若不曾中的只是枉矢如今且要分
 別是非是底直是是非底直是非少間做出便
 會是若依希底也喚是便了下稍只是非
 須是要做第一等人若決是要做第一等人若才
 力不逮也只得第四五等人今合下便做第
 四五等人說道就他才地如此下稍成甚麼物
 事
 須是先理會本領端正其餘事物漸漸理會到上
 面若不理會本領了假饒你百靈百會若有些
 子私意便粉碎了只是這私意如何卒急除得
 如顏子天資如此孔子也只教克己復禮其餘

弟子雖不同莫不以此意望之如冉求仲田當
初他豈是只要做到如此聖人教由求之徒莫
不以曾顏望之無奈他何才實只做到這裏如
可使治其賦可使爲之宰他當初也不止是要
恁地

學者如本領是了少間如兩漢之所以盛是如何
所以衰是如何三國分併是如何唐初間如何
興起後來如何衰以至於本朝大綱自可理會
若有工夫更就裏面看某之諸生度得他脚手
也未可與拈弄許多只是且教他就切身處理
會如讀虞夏商周之書許多聖人亦有說兵刑
說賞罰只是這箇不是本領曾子臨終叮嚀說
及君子所貴乎道者三動容貌斯遠暴慢矣正

顏色斯近信矣出辭氣斯遠鄙倍矣籩豆之事
則有司存上許多正是大本大原如今所理會
許多正是籩豆之事曾子臨死教人不要去理
會這箇夫子焉不學則常師之有惟是孔
子却都曾理會來到孟子是不說到這細碎
上答滕文公喪禮只說諸侯之禮吾未之學也
吾嘗聞之矣齊疏之服饘粥之食自天子達於
庶人這二項便是大本大原

或問顏子如何克己復禮文公曰公且思量顏子
如何心肯意肯要克己復禮自家因何不會心
肯意肯去克己復禮這處須有病根先要理會
這路頭方好理會所以克之之方須是識得這
病處須是見得些少功名利達真箇是輕克己

復禮真箇是重真箇是不恁地不得
伊川曰孟子才高學之無可依據學者須學顏子
入聖人爲近有用力處文公曰學者要學得不
錯須是學顏子孟子說得籠不甚子細只是他
才高自至那地位若學者學他或會錯認了他
意思若顏子說話便可下手做孟子底更須解
說方得
質敏不學乃大不敏有聖人之資必好學必下問
若就自家杜撰更不學更不問已是九下了聖
人之所以爲聖也只是好學下問如舜自耕稼
陶漁以至爲帝無非取諸人以爲善孔子說禮
吾聞諸老聃云這也學老聃方知這一事
學者言目下且看先生動容周旋以自檢先生所

著文義却自歸去理會文公曰文義即是日下
所行底如何把文義別做一般看若不去理會
自文義終日只管相守閑坐如何有這道理文義
乃是躬行之門路躬行即是文義之事實
看文字不可恁地看過便道了須是時復玩味到
自得義理與踐履處融會方是自得這箇意思與
尋常思索而得意思不同

文公曰一動一作一坐一立一飲一食都有是非
是底便是天理非底便是人欲如孔子失饑不
食不時不食割不正不食不多食無非天理如
口腹之人則多也食不正也食不時也食失饑
也食便都是人欲便都是逆天理
有道理只管進只管細便好只管見上面只管有

一重方好如一物相似剝一重又有一重又剝
一重剝到四五重剝得許多重都盡方見真實
底今人不是不理會義理只是不肯子細只守
着自底便了是是非非一向都沒分別
如看道理辨是非又須自高一着方判決得別人
說話如堂上之人方能看堂下之人若身在堂
下如何看見子細
九看文字須要人在裏面猛索一番要透徹方能
得他脫離若只略略地看過恐終久不能得他
脫離此心又自不能放下也

自家一身是天造地設已盡擔負許多道理纔理
會得自家道理則事物之理莫不在這裏一語
一默一靜一動一飲一食皆有理纔不是便是

遠這理若盡得這道理方成箇人方可以拄天
踏地方可無負此生若不盡得此理只是空生
空死空具許多形骸空受許多道理空喫了世
間人齎若見得道理世上許多閑物事初沒要
緊要做甚麼

問忠信所以進德也脩辭立其誠所以居業也知
至至之知終終之可與存義也文父曰上面忠
信與脩辭立誠便是材料下面知至知終惟有
實了方能如此大抵以忠信為本

忠信只是實若無實如何會進如播種相似須是
實有種子下在泥中方會日日見發生若拋箇
空穀下在裏面如何會發生即是空道理須是
實見得若徒將耳聽過口說過濟甚事忠信所

以爲實者且如孝須實是孝方始那孝之德日
進一日如弟須實是弟方始那弟之德日進一
日若不實却無根了如何會進今日覺得恁地
明日使漸能熟明日方見有一二分後日便見
有三四分意思自然覺得不同立其誠誠依舊
便是上面忘信脩辭是言語照管得到那裏而
亦須照管得到居業是常常如此不少間斷德
是得之於心業是見之於事進德是自覺得意
思日強似一日振作似一日不是外面事只是
自見得意思不同業是德之事也德則欲日進
業要終始不易居是存而不失之意可與幾是
見得前面道理便能日進向前去存義是守這
箇義只是這箇道理常常存在這裏可是心肯

意肯之義譬如昨日是無奈何勉強去爲善今
日是心肯意肯要去爲善

如今理會道理且要識得箇頭若不識得箇頭只
恁地散散逐段說不濟事若識得頭上有源頭
下有歸着看聖賢書便句句着實句句爲自家
身已如此以講學要知這源頭是甚麼
只在身已上看道理盡是自家固有底仁
義禮智皆廣之若火之始然泉之始達這
箇是源頭見箇了學方可看聖賢
說話恰如人當行賢言語作引路
一般不然徒然記外面閑話聖賢
汲汲教人只在這些子過那邊去便都無
些子着身已都是要將言爲別人全不爲日

家身已纔就這邊未便是自工夫這正是
爲人處
且如見說毋不敬便定定着毋不敬始得見說思
無邪便定定着思無邪始得書上說毋不敬自
家口讀毋不敬身心自恁地怠慢故事詩上說
思無邪自家口讀思無邪心裏却胡思亂想這
便不是讀書又如說足容重須着重是天理合
下付與自家須當重自家若不重便自壞了天
理手容恭須着恭是天理付與自家便當恭自
家若不恭便自壞了天理且容端須着端是天
理合下付與自家便當端自家若不端便自壞
了天理口容止須着止是天理合下付與自家
便當止自家若不止便自壞了天理聲容靜須

着靜是天理合下付與自家便當靜若不靜便
自壞了天理以至頭容直氣容肅立容德色容
莊皆然把聖賢說話將來學便是要補填得元
初底教好又如說非禮勿視自是天理付與自
家雙眼不曾教自家視非禮勿視非禮便不是
天理非禮勿聽自是天理付與自家雙耳不曾
教聽非禮才聽非禮便不是天理非禮勿言自
是天理付與自家一箇口不曾教自家言非禮
才言非禮便不是天理非禮勿動自是天理付
與自家一箇身心不曾教自家動非禮才動非
禮便不是天理
須就源頭看教大底道理透闊開基廣開址如要
造百間屋須要有百間屋基緣這須理本同甲

有許多乙也有許多丙也有許多
秀才未說道要他理會甚麼高深道理也須知得
古聖賢所以垂世立教之意是如何古今盛衰
存亡治亂事體是如何從古來人物議論是如
何這許多眼前底全不識如何做士人今世之
所習雖做得官貴窮公相也只是箇沒見識底
人若依古聖賢所教做去雖極貧賤身自躬耕
而曾次亦浩然視彼污濁卑下之徒曾大澁之
不若
如今人也須立箇志趣始得還當自家要做箇甚
麼人是要做聖賢是只要肯簡做箇人天教自
家做人還只教恁地便是了閑時也須思量着
聖賢還是元與自家一般還是兩般天地交

付許多道理與人不獨厚於聖賢而薄於自家
自家是有這四端是無這四端只管在塵俗裏
面裏還曾見四端頭面還不曾見
林子淵問知止而有定至慮而後能得文公曰知
與行工夫須着並到知之愈明則行之愈篤行
之愈篤則知之益明二者皆不可偏廢又須先
知得方行得所以大學先說致知中庸說智先
於仁勇而孔子先說智及之然後學問謹思明
辯力行不可闕一

蔡季通說盡心謂聖人此心才見得盡則所行無
不盡故程子云聖人無事於力行文公曰固是
聖人有這般所在然所以爲聖人也只說好問
默而識之好古敏而求之那曾說知了便了

揚通老問浩然之氣文公不答久之曰公若留此
數日只消把孟子白去熟讀他逐句自解一句
自家只排句讀將去自見得分明却好來商量
若驀地問後待與說去也徒然康節先生又謂
其學於李挺之每有扣請必曰願先生只開其
端勿盡其意他大意只要待自思量得之大凡
事理若是自去尋討得出來直是別
文公語黃敬之曰這道理也只是如此看須是自
家自奮迅做去始得看公大病痛只在箇懦弱
須是便改向勇猛果決合做便做不要安排不
要等待不要靠別人之會靠書籍言語只是自
家自默檢公曾看易易裏說陽剛陰柔陰柔是
極不好

學者為己底直是苦切事都是自家合做底事如
此方可不如此定是不可今有苦學者因甚恁
地苦他只為見這箇物事是自家合做底事如
人喫飯是緣自家肚飢定是要得喫又如做家
主要錢使他在外面百方做計一錢也要將歸
家這是為甚如此這只是為自家自身上事如
此為學如何會無所得

許多道理孔子恁地說一番孟子恁地說一番都
恁地懸空掛在那裏自家須自去體認得
學者言在家衮衮但不敢忘書冊亦覺未免間斷
文公曰只是無志若論家事又如何汨沒得自
家如今稍高底人也須會擺脫得過山間坐一
年半載是做多少工夫只恁地也立得箇根脚

若時往應事也無害較之一向在事務裏衮是
爭那裏去公今三五年不相見又只恁地悠悠
人生有幾箇三五年
元亨利貞仁義禮智金木水火春夏秋冬將這四
箇只管涵泳玩味儘好
問張子謂使心意勉勉循循而不能已過此幾非
在我者是如何文公曰學者只斐勉勉循循而
不能已才能如此便後面雖不用大段着力也
自做去如推一箇輪車相似才推得轉了他便
滔滔自去所謂學而時習之不亦悅乎者正謂
悅後不待着力而自不能已也
文公論人之爲學如今之兩下相似兩旣下後到
處濕潤其氣易得蒸鬱才略晴被日頭略照又

蒸得雨來前日克旱時只緣久無雨下四面乾
枯縱有些小雨都滋潤不得故更不能蒸鬱得
成人之於義理若見得後又有涵養底工夫日
日在這裏面便意思自好理義也容易得見正
如雨蒸鬱得成後底意思若是都不去用力者
日間只恁悠悠都不曾有涵養工夫說或理會
得些小道理也滋潤他不得少間私慾起來又
間斷了正如亢旱不能得雨相似也
爲學須是已分上做工夫有本領方不作言語說
若無存養儘說得明自成兩片亦不濟事况未
必說得明乎要須發憤忘食痛切去身分去做
工夫莫荏苒歲月可惜也
大凡爲學有兩樣一者是自下面做上去一者是

自上面做下來自下做上者便是就事事旋旋
尋箇道理湊合將去得到上面極處亦是一理
自上面做下者便是先見得箇大體却自此而
觀事物見其莫不有箇當然之理此所謂自大
本而推之達道也若做工夫者也須從大本上
面理會將去便好昔明道在扶溝謂門人曰爾
輩在此只是學某言語蓋若行之謝顯道請問
焉却云且靜坐葉味道因云雷在地中復先王
以至日閉開商旅不行右不省方在學者分上
說便是要安靜涵養這些子善端耳文公曰若
着實做工夫要知這說話也不用說若會做工
夫便一字也來這裏使不着此說某不欲說與
人却恐學者聽去便做空寂認了且如程門中

如游定夫後來說底話大段落空無理會處未
必不是在扶溝時只恁地聽了
子善因言平日學問次第文公曰此心自不用大
段拘束他他既在這裏又要向那裏討他要知道
本只是爭箇醒與睡着耳人若醒時耳目聰明應
事接物便自然無差錯處若被私欲引去便一
似睡着相似只要與他喚醒來才醒便無事矣
子善因云釋氏有豁然頓悟之說不知使得否不
知倚靠得否文公曰某也見叢林中有言頓悟
者然後來看這人也只尋常如陸子靜門人初
見他時常云有所悟後來所為却更顛倒錯亂
看來所謂豁然頓悟者乃是當時略有所見覺
得果是淨潔快活然稍久則却漸漸淡去了何

嘗倚靠得來子善云舊時也有這般狂底時節
以爲聖人便即日可到到復來果如先生所云
漸漸淡去到今日只得遂旋挨去然早上聞先
生賜教云諸生工夫不甚超詣其退而思之不
知如何便得超詣文公曰只從大本上理會亦
只逐旋挨去自會超詣
此心固明萬理具足外面理會得者即是裏面本
來有底只要自大本推之達道耳
本領上文工夫外面都是閑須知道大本若立外
面應事接物底道理都是大本上發出
凡看文字初看時心尚要走作道理尚見得未
定猶沒奈何到看得定時方入規矩又只在
印板上直說相似却不活不活則受用不得須

是玩味反覆到得熟後方始會活動方有受用
處若只恁生記去這道理便死了
讀書窮理當體之於身凡平日所講貫窮究者不
知逐日常見得在吾心目間否不然則隨文逐
義趕趁朝限不見悅處恐終無益
問書當如何看文公曰且看易曉處其他不可曉
者不要強說縱說得出恐未必是當時本意近
世解書者甚衆徃徃皆是穿鑿如呂伯恭亦未
免此也
橫渠行狀述其言曰吾學既得於心則脩其辭命
辭無差然後斷事斷事無失吾乃沛然精義入
神者豫而已矣他意謂須先說得分明然後方
行得分明今人見得不明故說得自儻侗如何

到行處分明
為學須是切實為已則安靜篤實承載得許多道理若輕揚淺露如何探討得道理縱使探討得說得去也承載不住
林中恭問下學之要受用處文公曰潞倚卓在屋下坐便是受用若貪慕外面高山曲水便不是受用底因舉詩云貧家淨掃地貧女好梳頭下士晚聞道聊以拙自修前人只恁地說了
向有人見尹和靖云諸公理會得箇學字否只是學做箇人人也難做如堯舜方得是做箇人學者理會道理當深潛沉思讀書初勤敏着力子細窮究後來却須緩緩溫尋反復玩味道理自出又且不得貪多欲速直須要熟工夫自熟出

只守着一些地做得甚事須用開闊看去天下萬事都無阻礙方可
功夫要趲期限要寬
為學纖毫絲忽不可不察若小者分明大者越分明
或謂性相近習相遠惟上智與下愚不移書中謂惟聖罔念作狂惟狂克念作聖若如此則又有移得者如何文公曰上智下愚不移如在作聖則有之既是聖人決不到作狂在此只是甚言不可不學

學問聖人十年功夫文公曰不須理會這箇且會志于學能志學許多科級須當還我
問下學上達聖人恐不自下學中來文公曰不要

言金卷一
高了聖人高後學者如何企及說得聖人低越
有意思
虚心順理當守此四字
致知誠意是學者兩箇關致知乃夢與覺之關誠
意乃惡與善之關透得致知之關則覺不然則
夢透得誠意之關則善不然則惡致知誠意以
上功夫較省逐旋開去至於治國平天下地步
愈闊却須要照管得到
聖賢言語大約似乎不同然未始不貫只如夫子
言非禮勿視聽言動出門如見大賓使民如承
大祭言忠信行篤敬這是一副當說話到孟子
又却說求放心有心養性大學則又有所謂格
物致知正心誠意至程先生又專一發明一箇

敬字若只恁看似似乎參錯不齊千頭萬緒其實
只一理學者曰區區於文字間只見得異實下
工夫則貫通之理始見文公曰然只是就一處
下工夫則餘者皆兼攝在裏聖賢之道如一室
然雖門戶不同自一處行來便入得但恐不下
工夫耳

學者須嚴密理會銖分毫析
泛觀博取不若熟讀而精思
務反求者以博觀為外馳務博觀者以內省為狹
隘墮於一偏此皆學者之大病也
師友之功但能示之於始而正之於終耳若中間
二十分工夫自用喫力去做既有以喻之於始
又自勉之於中又其後得人商量是正之則所

益厚矣不爾則亦何補於事
下學者事也上達者理也理只在事中若真能盡
得下學之事則上達之理便在此
問博學與近思莫相妨否文公曰博學是都要理
會過近思是注心着力處博學是箇大規模近
思是漸進工夫如明明德於天下是大規模格
物正心誠意脩身齊家便是次序亦着學豈可
道理會得一件其他不必理會然亦須理會一
件了又理會一件
今之學者自是不知為學之要學只要窮得這道
理便是天理雖聖人不作天理自在天地間天
高地下萬物散殊流而不息合同而化天地間
只是這箇道理流行周偏不應說道聖人不言

這道理便不在這道理自是長在天地間只借
聖人來說一通過且如易只是箇陰陽之理而
已伏羲始畫只是畫此理文王孔子只是發明
此理吉凶悔吝亦是從此推出且如書載堯舜
禹許多事業與夫都俞吁咈之言無非是此理
為學之道須先存得這箇道理方可講究若居處
必恭執事必敬與人必忠與如顏子直須就視
聽言動上警戒到復禮處仲弓出門如見大賓
使民如承大祭是無時而不主敬如今亦不須
較量顏子仲弓如何會如此只將他那事就自
家切已處便做他底工夫然後有益
聖賢千言萬語只是要行得守得
文公謂杜叔高曰學貴適用


康節從李挺之學數而曰但舉其端勿盡其言容
其思之他是恐人說盡了這便是有志底人
爲學只在明明其德一句悚然一念自覺非便是
明之之端君子存之存此而已小人去之去此
而已
文公曰一年離經辨志○古注離經斷句離經是讀
得成句辨志是知得這箇是爲己那箇是爲人
這箇是義那箇是利三年敬業樂羣敬業是知
得合當如此做樂羣便是知得滋味好與朋友
切磋五年博習親師博習是無所不習親師是
與他師相近了七年論學取友論得是論得有
頭緒了取友是知賢者而取之此之謂小成九
年知類通達旬子云倫類不通不足謂善學而


今學者但是不能推類到得知類通達是無所
不曉故能強立不反這幾句都是上兩字說學
下兩字說所得處
問格物是爲學始入道處當如何着力文公曰遇
事接物之間須一一去理會始得不成是精底
去理會粗底又放過了大底去理會小底又不
問了如此終是有欠缺但隨事隨物皆一一去
窮理自然分明
人只有箇天理人欲此勝則彼退彼勝則此退無
中立不進退之理九人不進便退譬如劉項相
拒於滎陽成臯間彼進一步則此退一步此進
一步則彼退一步初學者則要牢剗定脚與他
捱捱得一毫去則逐旋捱將去此心莫退終久

須有勝處其氣象
開卷便有與聖賢不相似處豈可不自鞭策
立志要如飢渴之於飲食才悠悠便是志不立
學者要親細務莫令心籠不
昔汪尚書見焦先生問為學如何焦先生只說一
句曰先立乎其大者
道之為體其大無外其小無內無一物之不在焉
故君子之學既能尊德性以全其大便須道問
學以盡其小其曰致廣大極高明溫故而篤厚
則皆尊德性之功也其曰盡精微道中庸知新
而崇禮皆道問學之事也學者於此固當以尊
德性為主然於道問學亦不可不盡其力也當
使之有以交相滋益互相發明則自然該貫通

達而於道體之全無欠缺處矣○玉山講義
文公因論為學曰愈細密愈廣大愈謹確愈高明

晦菴先生語錄類要卷第十四





Faint vertical text columns within a rectangular border, likely bleed-through from the reverse side of the page. The characters are mostly illegible due to fading.

書
本
部
印



